

	<p style="text-align: center;"><b>Journées du livre et du droit d'auteur</b></p> <p style="text-align: center;"><b>23.-28. Abrëll 2019</b></p> <p style="text-align: center;"><b>Mat alle Sënner liesen</b></p> <p style="text-align: center;"><i>Eng Propositoun vum Ministère fir Educatioun, Kanner a Jugend</i></p>
---	---

### **Ëm wat geet et?**

All Organisateur vum de *Journées du livre et du droit d'auteur* hunn zesumme fir 2019 d'Thema "Mat alle Sënner liesen" definéiert.

Bei der Aktioun geet et drëm, all d'Sënner anzesetzen, fir sech an d'Geschichten eranzersetzen, se ze genéissen, ze begräifen a se sech zu eegen ze maachen.

**Mat alle Sënner liesen** soll hëllef, d'Kanner fir Geschichten an domat fir Bicher ze beegeschten an hiren Interessi fir Bicher z'entwéckelen. Geschichten a Bicher kann ee lauschten, kucken, souguer richen, fillen a schmaachen.

Duerchbliederer a staunen, zu Geschichten dreemen, schwätzen a laachen, alles dat hëllef de Kanner, sech an d'Geschichten eranzefüllen, se begräifbar ze maachen, a Loscht op nei Geschichten ze maachen.

Alles däerf dobäi agesat ginn, Billerbicher, Mäercher, Hörbicher, Geschichten, Sachbicher, ... , den Themen an den Aktivitéite si keng Grenze gesat.

### **Wat ka gemaach ginn?**

Zum Motto vum 2019 bidde sech villerlee Aktivitéiten un:

- Geschichte kënne verännert ginn, fir datt se mat engem anere Sënn ze begräife sinn: eng geschriwwe Geschicht kann illustréiert ginn z. B. als Comic, e Gedicht, wat fir d'éischt gelies gouf, gött op verschidde Manéiere virgelies, ...
- Wimmelbicher a Bicher ouni Text kënnen agesat ginn; hei geet et fir d'éischt ëm d'Kucken an d'Verstoen. Da kënne Kanner Geschichten derzou erfannen, se ophuelen a se eleng oder mat aneren erëm lauschten.
- Et kann een eng bestëmmte Geschicht mat verschiddene Sënner erliwen: al an nei Buchfassunge vum dem Buch kucken, eng Versioun als Comic oder Graphic Novel liesen, sech Versiounen an anere Sproochen ukucken, an d'Hörbuch dervun eralauschten, e verfilmten Extrait kucken, et als Theater erliwen, ...

- D’Sënner selwer kënnen d’Thema sinn: déi klassesch fënnef Sënner, extra Sënner vun den Déieren, de “6. Sënn”. Hei gëtt et deels ganz spannend Sachbicher z’entdecken.
- Wéi erliewe Leit, deenen 1 Sënn feelt, Geschichten? Si notze Brailleschrëft, lauschten Hörbicher, loosse sech vum Computer Internetsäite virlesen, si erziele Geschichten a Gebäerdesprooch, ...
- Geschichte kënnen virgelies ginn, vum Auteur selwer, vum Enseignant, vu grouse Schüler fir méi klenger, mat Asaz vu Stëmm, Mimik a Gestik. Hei kann een och Eltere mat an d’Boot huelen an hir Familljesproochen erabréngen.
- Gedichter kënnen auswenneg virgedroen, illustréiert, ëmgeännert an erweidert ginn.
- Geschichten a Gedichter kënnen vu Musek respektiv Geräischer begleet ginn.
- Geschichte kënnen als “Lesetheater “ ëmgewandelt a virgedroe ginn, Zeene kënnen virgespillt ginn.
- Et kann ee Geschichten zu Lidder a Gedichter erfannen.
- Hörbicher an Hörspiller kënnen gelauschtert ginn, Bicher mat Tiptoi, Tingstëft o. ä. kënnen agesat ginn.
- Geschichte kënnen mam Kamishibai (japanesche Pabeiertheater) presentéiert ginn, sief et fäerdeg Geschichten oder där, déi d’Kanner erfonnt hunn.
- Sachbicher, deels z. B. mat spezielle Klappen oder Folien, ginn extra Abléck an e Sujet.
- Bicher kënnen gefillt a verglach ginn: den Aband, de Pabeier, d’Form, ...
- Fillbicher a Pop-up-Bicher kënnen genotzt ginn.
- Fillkëschten, déi mat Objeten aus enger Geschicht gefëllt sinn, kënnen agesat ginn.
- Et gëtt antëscht och scho Richbicher.
- Rezepten kënnen nogekacht ginn.
- Sachbicher iwwert d’Schmaachen (z. B. Uebst, Geméis, Gewürzer, ...) kënnen genotzt ginn.
- ...

### **Wéi kann ee matmaachen?**

Als eenzel Klass, als Zyklus oder ganz Schoul.

D’Responsabel aus de Schoulbibliothéike sinn d’Kontaktpersounen fir déi Aktioun.

**Umeldung (iwwert de Schoulbibliothecaire): mam [Onlineformulaire](#) (<https://tinyurl.com/jdl2019-ef-lux>) bis de 15. Mäerz 2019**



### **Wat geschitt mat den Aktivitéiten, déi gelaf sinn?**

A jiddwer Schoul sollen d'Aktivitéiten dokumentéiert an déi Dokumentatioun bis den 19. Mee 2019 erageschéckt ginn. Flott wier et allgemeng, wa mir d'Dokumentatioun an digitaler Form (300 dpi-Printqualität) kënnte kréien.

Wa Kanner op de Fotoen drop sinn, da géinge mir d'Enseignantë bieden, d'Autorisatioun vun den Elteren ze froen.

D'Schoulen, déi matmaachen, ginn um Internetsite vun de „Journées du livre et du droit d'auteur“ [www.liesen.lu](http://www.liesen.lu) an am Courier de l'Éducation nationale 04/2019 ernimmt.

De SCRIPT offrëiert Bicherpräisser un d'Schoulen, déi matmaachen.

Mir maachen an engem spéidere Courier de l'Éducation nationale e Réckbléck op d'Aktioun.

MENJE - SCRIPT

Promotion de la lecture

Edupôle Walferdange

BP 98

L-7201 Bereldange

Email : [anne-marie.antony@men.lu](mailto:anne-marie.antony@men.lu) / [eugenie.schaus@men.lu](mailto:eugenie.schaus@men.lu)

Merci fir d'Matmaachen.